

SAK 55/13 REGIONRÅDET FOR HALLINGDAL – MEDLEMSKAP I LANDSSAMANSLUTNINGA AV NYNORSKKOMMUNAR (LNK)

Saksopplysning

I sak 49/13, under eventuelt var eit punkt spørsmålet om ikkje Regionrådet for Hallingdal burde vera medlem av Landssamanslutninga av nynorskkommunar (LNK).

Det vart bestemt at til neste møte i Regionrådet skal dagleg leiar har førebudd sak om eventuelt medlemskap i LNK.

LNK (www.LNK.no) er ei samanslutning av kommunar, fylkeskommunar og interkommunale tiltak som har til føremål å fremja nynorsk språk og kultur i det offentlege. Landssamanslutninga vart stifta i 1993 og har no 123 medlemmer: 106 kommunar/fylkeskommunar og 17 interkommunale tiltak/regionråd.

Gjennom informasjon, direkte kontakt og jamlege møte med styresmakter og organisasjonar, samordnar LNK nynorskbrukarane sine interesser og rettar når det gjeld nynorsk materiell til bruk i kommunane, i skulen og i informasjon retta til publikum.

LNK arbeider for å skape positive haldningar til nynorsk språk og kultur og for at kommunane og styresmaktene tek desse sakene opp gjennom sine planverk.

Så lenge ein eller fleire av kommunane i Hallingdal er fullt betalande medlemmer i LNK, er medlemskapet for Regionrådet gratis. I Hallingdal er Gol, Ål og Hemsedal medlemmer. LNK driv nettstaden LNK.no som er eit viktig kontaktledd mot kommunane. Styret har vedteke å senda ut medlemsbrev til medlemene kvar veke, frå nyttår. På denne måten vil organisasjonen få endå meir kontakt med medlemene. LNK driv dessutan nettportalen startsida.no i samarbeid med ABC Startsidan.

LNK har laga eit fordelskort som sikrar politikarar og tilsette i medlemskommunane rimelege hotellrom. Hotell Bondeheimen i Oslo og Hordaheimen Hotell i Bergen gir særleg gunstige tilbod til LNK-medlemmer.

Vurdering

Regionrådet for Hallingdal har ikkje nokon vedteken målform, og eventuelt medlemskap i LNK handlar heller ikkje om val av målform i Regionrådet. Det meste av det som har vore produsert av planar, brosjyrar, presentasjonar, saker og det som ligg på heimeside er på nynorsk, fyrst og fremst ut frå at dagleg leiar har valt å nytte nynorsk som skriftspråk. For tilsette i Regionrådet er det praktisert valfri målform, noko som vil halde fram som prinsipp. Men i fleire samanhengar kan det vera rett eller formålstenleg å nytte nynorsk og dialekt.

Eit medlemskap i LNK bind ikkje Regionrådet på noko vis, men det bør likevel vera ein intensjon eller meining med eit medlemskap. I samband med Hallingdal 2020 som m.a. er eit profileringsprosjekt for Hallingdal, blir det bevisst nytta nynorsk og dialekt i enkelte samanhengar. Etter dagleg leiar sitt syn bør eit medlemskap i LNK fyrst og fremst vera med

utgangspunkt i ein profil Regionrådet eventuelt ynskjer å ha, som t.d. i samband med Hallingdal 2020.

Forslag til vedtak

Regionrådet for Hallingdal skal søke om medlemskap i Landssamanslutninga av nynorskkommunar.

Ål 16.12.2013
Knut Arne Gurigard
Dagleg leiar

Vedlegg: Vedtekter for landssamanslutninga av nynorskkommunar

VEDTEKTER FOR LANDSSAMANSLUTNINGA AV NYNORSKKOMMUNAR (LNK)

§ 1 FØREMÅL

Landssamanslutninga av nynorskkommunar (LNK) er ein interesseorganisasjon for kommunar, fylkeskommunar og interkommunale føretak.

Organisasjonen har som føremål å fremja nynorsk språk og kultur i offentleg verksemd.

§ 2 MEDLEMER

Alle kommunar og fylkeskommunar som gjer bruk av nynorsk i skulen og/eller administrasjonen, kan vera medlemmer av landssamanslutninga. På same vilkår kan interkommunale tiltak som brukar nynorsk vera medlemmer.

§ 3 LANDSTINGET

3.1 Landstinget sin status:

Landstinget er organisasjonen sitt høgaste styringsorgan. Tinget held møte annakvart år.

Kommunar, fylkeskommunar og interkommunale tiltak som har vore medlemmer i minst to månader før landstinget vert opna, kan møta på tinget med fulle rettar.

3.2 Innkalling til landsting:

Landstinget skal ha møte innan utgangen av juni måned. Innkalling med sakliste skal sendast til medlemene seinast to månader før tinget skal haldast. Endelege sakspapir skal sendast tre veker før tinget finn stad. Framlegg til saker som medlemene ynskjer skal handsamast på tinget, må sendast skriftleg til styret innan 1. mars.

Styret skal kalla inn til omframnt landsting når minst halvparten av medlemene krev det.

3.3 Representasjon på landstinget:

Kommunane har rett til slik representasjon på landstinget:

Inntil 3.000 innbyggjarar	1 utsending
Inntil 6.000 innbyggjarar	2 utsendingar
Inntil 9.000 innbyggjarar	3 utsendingar
Meir enn 9.000 innbyggjarar	4 utsendingar

Folketalet i kommunen pr. 1. januar i det året landstinget vert halde er grunnlag for talet på utsendingar.

Fylkeskommunane har rett til å møta med fem utsendingar, interkommunale tiltak med ein utsending.

Kvar utsending har ei røyst på landstinget. Medlemer med rett til meir enn ein utsending kan gje ein utsending skriftleg fullmakt til å røysta for å så mange utsendingar ein har rett til å senda.

Styremedlemene møter på landstinget med tale- og framleggsrett, men har ikkje røysterett med mindre dei er valde som utsendingar.

3.4 Vedtak på landstinget:

Vedtak vert gjorde med vanleg fleirtal. Endringar i vedtektene og vedtak om oppløysing av organisasjonen krev to tredels fleirtal av dei registrerte røystene (inkl. fullmaktsrøyster) på landstinget.

3.5 Landstinget sine oppgåver:

Landstinget vedtar sjølv endeleg dagsorden, og vel møteleiar, referent og to utsendingar til å skriva under protokollen saman med møteleiaren.

Fram til tinget er konstituert har styreleiaren ansvaret for møtestyringa.

Ordinære landsting skal alltid

- a) Godkjenna årsmeldinga.
- b) Godkjenna revidert årsrekneskap og balanse
- c) Vedta kontingent, rammebudsjett og handlingsprogram for komande to år.
- d) Velja styre, valnemnd og revisor.
- e) Ta stilling til innkomne framlegg.

§ 4 STYRET

4.1 Val av styre:

Styret skal ha fem medlemmer og tre varamedlemmer. "Begge kjønn skal til ei kvar tid vera representerte både blant dei faste medlemmene og varamedlemmene i styret.

Styremedlemmene vert valde for fire år, likevel slik at vekselvis to og tre står på val på kvart landsting. Varamedlemmene vert valde for to år.

Ved suppleringsval vert nye medlemmer valde for resten av funksjonstida til den som går ut.

Landstinget vel mellom styremedlemmene leiar og nestleiar for to år om gongen.

4.2 Styremøte:

Leiaren kallar inn til styremøte når han/ho synest det trengst, når dagleg leiar ber om det, eller når minst to av dei faste styremedlemmene krev det.

Styret er vedtaksført når minst tre av medlemmene er til stades. Ved likt røystetal gjer møtestyraren si røyst utslaget.

4.3 Styret sine oppgåver:

Styret leier landssamanslutninga i samsvar med vedtektene og vedtak som er gjorde av landstinget.

Styret har i tillegg desse oppgåvene:

- a) Arbeida ut framlegg til rammebudsjett for komande år, og for toårsperioden fram til komande landsting.

- b) Vedta årsbudsjett innafor dei rammer landstinget har vedteke. Styret kan her også gjera nødvendige endringar i desse rammene.
- c) Sjå til at rekneskapen vert ført i samsvar med lov, forskrifter og god rekneskapsskikk, og syta for at han vert revidert.
- d) Kalla inn til landsting, og førebu dei sakene som skal førehavast på tinget.
- e) Alle andre oppgåver som naturleg høyrer inn under styret.

§ 5 VALNEMND

Etter framlegg frå styret vel landstinget ei valnemnd på tre medlemer.

§ 6 ADMINISTRASJON

Styret tilset dagleg leiar, fastset kontorstad og vedtar løn og andre arbeidsvilkår. Innafor vedteke budsjett og dei rammer landstinget har sett for drifta, kan styret også oppretta andre stillingar i administrasjonen.

§ 7 MEDLEMENE SINE PLIKTER

7.1 Kontingent:

Medlenskommunane skal betala kontingent i høve til innbyggjartalet, med ein grunnkontingent. Fylkeskommunar og interkommunale føretak skal betala ein fast årskontingent, utan omsyn til folketalet.

Den del av kontingenten som byggjer på innbyggjartalet, skal ta utgangspunkt i folketalet per 1. januar.

Landstinget fastset kontingenten etter framlegg frå styret. Styret kan justera kontingentsatsane for det andre året.

7.2 Kontaktperson:

Kvart medlem pliktar å peika ut ein av sine tilsette til å vera kontaktperson for LNK.

§ 8 INNMELDING OG UTMELDING

Innmelding i LNK skal skje skriftleg til styret.

Utmelding av LNK må skje skriftleg og får først verknad to fulle kalenderår etter at slik melding er komen til styret.

§ 9 ENDRING AV VEDTEKTENE

Endringar i desse vedtektene krev to tredels fleirtal. Framlegg til endring av vedtektene frå andre enn styret må vera innkomne til styret innan 31. desember i året før landstinget skal haldast.

Vedtekne 18. juni 1993, med endring vedteken 9. juni 1995 og endringar vedtekne 7. juni 2001.